

四庫全書

集部

欽定四庫全書

集部
宋百家詩存卷七

詳校官監察御史_臣孫家賢

主事銜_臣徐以坤覆勘

總校官庶吉士_臣倉聖脉

校對官中書_臣方大川

謄錄監生_臣馮國柄

欽定四庫全書

宋百家詩存卷七

嘉善曹庭棟編

鄱陽集

彭汝礪字器資饒州鄱陽人治平二年舉進士第一
累遷監察御史裏行首陳十事指擿利害多人所難
言者元豐初以館閣校勘為江西轉運判官數上疏
論事元祐二年超為起居舍人權兵刑二部侍郎時

哲宗躬聽斷脩熙寧元豐政事人皆爭獻所聞汝礪
獨無建白或問之答曰在前日則無敢言於今則人
人能言矣進權吏部尚書以寶文閣直學士知成都
府未行章數上又降待制知江州至郡數月以病去
卒年五十四汝礪讀書為文志於大者言動取舍必
揆於義風裁卓犖為時所重著有易義詩義詩文集
五十卷弟汝霖汝方

瓦鼓

客遊南昌歸歸我四瓦鼓

瓦鼓自新建令仲文得之

渾完自甄冶質

朴排罌甌觸之散遺聲往往中商羽聲來殆天得不用
詢有瞽野心愛不徹取之置林宇竹梢奏清風似喜佳
物伍岸巾策筇枝共爾蠲毒暑世浮見此拙坐覺幽興
聚丹楹惜異時蕢桴想淳古君年比予少能亦珍此否
雪夜飲分題得雪字

顛風夜號花木折平明堦前三尺雪誰家羌笛落蚤梅
中夜南樓對明月苦寒侵人毛髮縮厭厭夜飲腸內熱

公才奔放欲萬里應恨低徊受羈紲一巢安穩身自在
生涯卻羨鳴鳩拙人生所值俱所樂萬事悠悠無可說
偶有名酒須盡醉醉輒題詩如靖節君不見萬卒征南
凱未旋戎衣雖厚冷如鐵

寄葉法曹

參軍琢玉為天性靈臺一點秋江靜少年勤苦取富貴
不知勤苦今為病世人喜邪疾中正愛君與物終無競
圍碁坐爭百局勝雕弓力挽六鈞勁碁子勞神弓力硬

此圖養疾俱非令作詩勸君今勿更詩書自足資游泳
奧室重簾鏤幽徑我不見君心恹恹疾病勿憂有天命
愜悌君子神之慶

寄友人

漢上近多雨江頭應好風想君當此時挂席隨孤鴻翔
龍壓大浪畫鷁凌長空男子四方志生時射桑蓬爾來
何遲遲吾憂祇忡忡安得百頃田稍鄰五老峯蚤賦歸
去來同為采芝翁

和君時弟見貽

鳬短非不足鶴長非有餘泰山逮毫芒其理同一如君
才乃騁騶行矣無踟躕萬里不加鞭日力復有舒豈如
老鈍馬寸進徒渠渠低頭戀棧豆時復仰天噓徊徨槽
檻閒不用論智愚惟中可以休吾與子歸與

讀史

婁敬脫輓輅獨建金城安韓信出羈旅遽上將軍壇謀
出萬乘驚名飛百夫歎丈夫松桂姿直氣虹霓蟠得時

樹功業未謝婁與韓

暴雨

雲如驚瀾如潑墨萬竅怒號四山黑
電母搖睛嚇風伯疾雷怒張坤軸側
雨如河傾如雨石上山下山泉動脈
石漂木拔崖裂折高原立腳成大澤
古寺顛前後岡逼瓦腐椽折破無壁
泥佛露頭水浸臆苔錢藤蔓生金碧
背堂衆流如箭激挾氣急欲投閒隙
衣掣腳芒看溝澮有惻然徒老荊棘
荷戈與父甲不釋中夕愁居晝艱食

我今乃敢求安席閭閻人家水沒極壯夫浮汨老者溺
高占鳥巢據猿棧可憐欲走無羽翮我起熟視惟歎息
斷檠棲直在簷額雞飛犬跳上屋脊蛟鼉睥睨迷所宅
乾坤欲晴但頃刻廣庭泥深猶數尺大浪如銀沸阡陌
萬馬相蹴轂相擊窮民欲炊無釜鬲蚯蚓在堂魚在闕
兒童捕魚不知戚溪南不能過溪北跬步如越與吳隔
溺者漫不見蹤跡東邨西邨哭聲塞手援不能淚霑臆
掩齒雖欲終何益天理噓嗟杳難測惻惻獨無辜不愛惜

莽填溪魚瘞沙礫乃能屈折容盜賊鑿險開深聽藏匿
不以血膏膏鋒鏑皇天無情禍福直昔也昭昭今惑惑
我歌且謠寫悲惻竹林一夜生秋色

和執中遊山

峩峩楚山前屹屹樊堞後汗漫清漢左蜿蜒大石右雷
霆沸波瀾龍虎卧岡阜春風無偏陂潤澤到藜莠日月
有底急匆匆似奔走樂哉城南遊矧復得智叟橫踰路
東頭縱踏山北口逶迤陟嵌崿莽蒼度林藪巍亭立青

冥隱几見十部音剗崖石險欲落參差露妍醜沈深開殿

閣闕穴得圜白尚或埋泥塗誰能斬薪煇法海惟我汎
禪闕與君叩清泉給醍醐一飲失塵垢丹鳳香不來瞻
想更搔首潭潭谷中寺花木照堂坳樓閣寄宮堯鼓危
貼星斗白雲雜香霧終日在戶牖有沼旱不枯金蓮豈
凡藕不見白馬至似聞蒼龍吼一雨作豐年懽愉逮雞
狗說車高陽池遺事問黃耆歎息當世士所懷自非苟
方醉白接羅寧貴朱組綬拭目墮淚碑徘徊想忠厚河

內借寇恂南陽祠杜母彼惟一純誠名等天地久愛君
所志遠堯舜望高后譚經破小辨獨自持綱紐德愛在
章貢甘棠不枯朽遭廻久荆楚白髮嗟未偶軒昂更自
拔怵惕匪人咎寧甘凍餓死不一變厥守吾惟人間世
所遇皆所授生死等夢幻可能憬然否譬猶二人奕日
夜競勝負紛紛置黑白畢竟一何有但願山水盡作
杯中酒時時與君醉獨與造化友忠臣不忘君不問在
歆歆

金瓶梅
卷七
答同舍遊凝祥池

仙宮神靈之所宅樓閣倚天一千尺先生好遊猶挾冊
藜莧不慙吾鼎食凝祥池頭三月春腰金騎犢多貴人
天邊五岳烟霞閣海上三山雨露新蛺蝶能飛燕能舞
鳳皇在雲鴻在渚仙人參鸞入雲霧寂寂不聞青鳥語
洞天落日晚沈沈漁舟縹緲桃源深紅玉坐看花著子
青雲行見葉成陰疾雷怒飛風雨急瘦馬不行歸旆溼
投閑一日須一來歲時變化猶呼吸

行西城

我將行西城曲指計日月汝來今幾時已卜錢塘別吾
衰況多病冉冉鬢已雪安能久去汝漫自投羈紲田園
苟可飯聲利非吾屑與汝歸去來相看至耆耄蒼茫尚
無涖空復愁如結

菊苗

重陽黃菊花零落殆無有微陽動淵泉嫩葉出枯朽青
青好顏色寂寥霜雪後物理如轉環開花豈其久

途中和君時

聞君欲脂車輾轉睡不安憂心頑如石百計不可寬鴈
鳩祇在桑歸鴈乃雲端一瞻百歎息強飲終無歡

次正夫相寄佳句

朱橘大可圍白魚闊盈尺掀林擷葩花艤岸披的皪我
酒清且旨於馬餞佳客鴻飛不知遠日暮寒雲碧回瀾
祇如昨不見舟行迹寄詩何道麗若見好顏色遙想翰
墨揮波濤瀉胸臆維纚遠林外坐看晨風翼萬物歸一

致知公無不適人之與天地同是為形役

次正夫途中懷親韻

動靜非兩途久勞逸更好開門看白雲
婉婉出山嶠身閑亦已樂言念親及菴
豈無青精飯每食終不飽鏡中髮如漆
一夜成素縞言歸采其蘭堂北種護草
日以五鼎食不如綵衣老我今無此樂
感泣形已槁日夜思故鄉敔眠夢郊保

寄君時四章章四句

我脂我車陟彼高岡母也吾懷匪居或忘我帆我舟汎
彼大江母也我憂匪食或皇我池有魚亦可以羹何必
鮪及魴叔兮其歸哉我田有菽苟可以食何必稻與粱
叔兮其歸哉

一章章四句二章章三句三章章五句寄君時
我治斯何曰治我身我事斯何曰事吾親我學未信乃
先從仕孰云何自治我親戴老不知乎養志孰云何善
事嗟嗟予季言以訊予有詩有書是足與居叔兮其歸

與嗟嗟予季歌以啟予有田有廬亦可與娛叔兮其歸
與

寄甯和仲二章章四句

鳳山之泉孔潔且長止而不流是不如汙潢鳳山之木
可棟大廈舍而殘之是將與荊棘而並化

方城與君時相別遇雨因寄是詩

五更赤晴平旦雨愁風不開風勁怒霞電夜落大如芋
日月不出愁如兔兄曰嗟予季行役道阻且脩日云暮

泥深一尺水交注僕肩不任馬蹄駐一車十牛不能御
晨征忽忽立乘遽恐汝悲啼不還顧昔知為快今知誤
恨不赭陽一月住人生百年惟所過曲折萬變皆歸數
乾坤與人同寄寓擾擾眼前皆細故慎勿動心悲景露
九阪王陽猶叱馭平明天晴卷雲霧驂騑安穩行道路
一日千里如跬步

遊峴首

去年冬少雪二月春始晴南遊峴首山東下石頭城揉

藍染江水爛錦貼園英幽亭一杯酒不用千載名

叔子祠堂

不折亭下栢不采山頭石羊公昔茲遊千載人愛惜焚
香薦卮酒一拜三歎息卻汎峴水波汪洋感餘澤

恒河

恒河世界浮漚上漘漘衆生久流浪老蠶作繭祇自纏
枯木生蟲不相放止止靈泉風震蕩昭昭惠日雲遮障
卻語諸人莫惆悵煩惱菩提同一相

送君時

思親一日如三歲去家十舍如萬里投明叔也欲別我
枕上聞難淚如洗丈夫蓋棺事則已君雖白髮猶壯齒
奚慚折腰五斗米三釜及親胡不喜桑弧蓬矢射四方
男子生來志如此

白馬寺

老龍挾神機變化無拘攣大作四海水斂為一泓泉白
露泛素液黃金折嘉蓮樂哉襄陽人歲歲無凶年

寄十二十四弟

有弟有弟各一隅
萬里不見徒嗟吁
江湖春色又歸矣
庭檻花枝還有無
欲寄我聲無鯉魚
欲寫我恨無酒壺
開編一見鵲鴿詩
潛然淚落如真珠

武岡路

朝行黃茅岡暮宿黃茅驛
一岡復一岡岡岡如絡繹
一驛復一驛思親頭易白
何時自此還行李兼晨夕

舟過當塗

悠悠章江柁復自姑孰北此身與此水日夜俱無息
關林中鳥軟語如相識楊柳枝葉長青青祇如昔惟予
鬢閒髮種種添新白開尊泛溪水宛轉隨山色四方本
予志夷險非我惻挂帆出長江萬里追鵬翼

沐浴有感

去垢如去邪不欲留毫分髮不止一沐身不止三薰如
何迷本原浴德不自勤區區養穢棘俯仰愧前聞

久雨

十日七日雨十步九步水師徒宿蓐莽宴坐吾亦恥其
誰護封穴未忍烏鼠死天意若有謂無人可言此

寒食

山川路崎嶇於茲遇寒食冒雨雖甚苦驅車不遑息敵
愁酒無功悅目花少色誰當逆旅思獨任清吟力

偶題

雖然鳳之雛傑然龍之駒九天無亂雲萬里多坦途霜
蹄風翮一朝舉疲驚燕雀安能俱

寄春卿

相約童稚閒遂成歲寒圖奈何離別多各自東西隅我
心明月輪子志青松株明月千里光豈為吳越殊青松
四時心豈為風霜枯相思不相見作詩報區區

衢州道中

登山復降山僕膝良已酸出溪復入溪僕衣未嘗乾嗟
余久羈旅囊橐亦已殫無食充爾飢無衣覆爾寒買酒
聊一醉行行莫長歎

冬日道中作

夜卧衾裯單不敢嗟體寒晨餐蔬食微不敢歎腹飢重
念飢寒民亦有甚我身我心苦嗟吁彼俗當何如

送蔣司勳赴河北漕使

於皇時宋治定百年朝廷肅雍以有多賢蔣侯孔碩克
明其德其立巍巍其嚴翼翼英考是擢以司邦直彼富
貴不仁人則憚之侯曰吾治之彼孤有幼人則侮之侯
曰吾綏之竄逐流落江湖東南侯曰行哉義豈吾慚皇

帝思之擢使於閩於淮於江治績升聞皇帝曰咨朕寵
爾勤俾相爾攸宜莫若河朔往都漕事以謀以度侯拜
稽首受命不敢居言秣其馬言脂其車其馬駢駢雖疾
而儀其車軒軒既博且閑蔣侯歸止覲於天子天子是
喜曰朕有賢卿士明明蔣侯政事文章以明以將當至
廟堂矣止河一方汝礪作詩式贈其行俾人詠歌以永
厥聲

送上官察院歸閩中

南山幽幽非可陵之丘淵淵其淵非潢汙之泉我徒以
趨君假我以車我泳而游君載我以舟君行未至我心
匪樂君去不遲如之何弗思是用作歌以告吾懷

擬田園樂

買田何須近郭作屋卻要依山青松共我終始白鳥隨
人往還

春酒家家初熟春花處處光輝看花更攜酒去酒醉卻
插花歸

山色依雲閣澹溪聲漱玉玲瓏
孤笛醉吹明月扁舟卧
釣秋風

霜寒未忝初熟日落牛羊自歸
樂事須還田舍浮名不
入柴扉

小舟過陂口

輕舟落陂滑脫去如一葉篙工習
鼓險振呼矜巧捷急
水生涼風盛暑慰汗浹涉遠雖力
壯臨危固心怯不如
山居安魂夢亦安帖

和叔宜弟

悠悠白雲飛戚戚感我情白雲行四方顧我豈憚行投
袂起番水荷擔指宜城所懷再踰秋計以頃刻成遠裝
有書帙貧橐無金羸馬羸牛徒步僕痠復兼程天寒雪
頻飛山阻路少平林端虎豹跡驛後豺狼聲我行有所
懷雖壯如孩嬰入門旅愁破侍席春風生丁寧道懷感
惻怛一坐傾我今授汝記汝當以孝名孝能事其親榮
亦及乃兄乃兄久衰矣山川倦遐征歸與治爾田我歸

耦而耕

遊西山

我少及長從公遊我今老矣公白頭淵明彭澤不歸去
太史周南方滯留愛山興與精神聚形骸自笑縻珪組
欲騎馬去陟彼硯空羨鴻飛在於渚西山第一列洞天
別有日月無歲年洪崖已成丹竈藥瑤池每賦白雲篇
嘒嘒蟬噪竹枝露斑斑豹宿巔崖霧伯兮伯兮歸勿遽
人閒早歲須霖雨秋雨辛勤開菊花春風取次生蘭芽

我雖調公不敢易龍駒會去超胡沙

和彥衡直講

日隱天北角月飛海東頭清輝到堂除轉覺氣象幽
睨天地閒無物奚為憂

是身如芭蕉况復身外名至人本無心冒為寵辱驚
風隨月明來終夜共清白先生靜無語獨看庭前栢冠
帶褫客衣詩書倦塵迹好風此時來應與君相識

照月槐影碎吹風栢聲繁悠悠此時心可樂不可言

皇帝郊祀禮畢詣景靈恭謝次履中學士韻

黎明駕出告熙成朝野人呼萬歲聲日上天門春意近
雪殘宮瓦曉寒生六龍寵護隨天仗三爵恩容醉御觥
德似丘山纖未報白頭知愧不知榮

嵩夫庭佐欲歸出長安以詩邀遊後圃

馬蹄容易去吾東行李紛紛計已息還使寸腸隨夜月
不知一淚落春風雙飛露草看原鵲獨宿雲溪念塞鴻
更約藏舟今日飲百壺清笑慰飄蓬

和瑛師

江湖日夜著東流水上乾坤一點浮
隔浦雲山隨客步
近邨花竹慰人愁
同舟自有林宗在
結社還須惠遠遊
酒興正酣歸更嬾
坐看涼月上滄洲

奉懷深父學士友兄

泛泛公舟何所之
江湖不似月相隨
關西夫子吾所畏
河上丈人今所思
蓬髮白如相別日
菊花黃似去年時
看花欲飲竟無味
不是貧家缺酒卮

看山更飽更無厭野色雖寒亦不嫌風作浪頭高突兀
雲埋雨腳細廉纖一雙遠岸釣魚艇三尺近邨沽酒帘
海上浮舟憶彭蠡門前栽柳舊陶潛

次去華學士韻

九衢塵土暴秋陽官殿深沈蚤自涼庭栢染霜千丈碧
籬花著雨一番黃天邊河漢波瀾闊海上蓬萊日月光
文物豈惟淹漢魏太平久矣四三皇

寄君時弟

日夜風前聽好音書來一讀一傷心淚搖眼尾催花發
愁結蒼頭見雪侵秋徑自栽彭澤菊夜堂時奏武城琴
事多不廢看書否白首知君惜寸陰

送祖道朝奉

二月同舟出宋都轉頭即是十年餘可憐老大猶為客
莫怪尋常不作書蠟屐阮孚人不會鱸魚張翰子何如
寄聲莫汙清風地留與先生作隱居

送池須文長官

龍淵虎穴少窮探
老大生涯一劍鐔
曲沼鴛鴦多白髮
雕籠鸚鵡久青衫
能知令尹三無愠
正似嵇康七不堪
見說明朝好天色
鵬程從此穩圖南

豐潮

漫漫平湖千里賒
南州今作畫圖誇
波瀾雨過魚兒出
草木春歸荔子花
山近冷光搖几席
地平餘潤入桑麻
使君恩德還如水
長滿羅浮十萬家

呈通判承議

山邊置酒水邊行魚鳥於人各有情終世果能著幾履
此時聊可濯吾纓啟期拍手誇三樂漁父張頤笑獨清
四海一舟歸未得低徊長恐負平生

和范學士韻

清香一炷意超然萬事無緣更動顏野鳥銜花來丈室
煙蘿招月出遙山居方不礙遊方內住世還如出世閒
卻笑晚年貪著事野邊湖外夜忘還

灘上

片帆逆水過溪山
吾賤能諳世路難
小雨作雲迷湖谷
急風吹雪上波瀾
草根已定春來意
梅蕊猶含臘後寒
漸老豈能支道路
扁舟欲去老漁竿

寄君時直宿

天寒不歸汝安否
日暮有懷如此何
丈室全如在林壑
重雲漫不見星河
高風側聽雖雖鴈
濡露長悲蓼蓼莪
不是不知詩廢事
相思不寤自成歌

鴈池

池水人言是鴈池池邊兀坐久忘歸蓬瀛仙子紅蓮出
湖海幽人白鷺飛楊柳垂陰留客佩滄浪潑翠點人衣
故園一別頭今白目斷江邊舊釣磯

送周朝議赴郢州

驅馬悠悠何所之峴山南去習家池蓮花可愛肌如雪
鷗鳥何為鬢亦絲一葉林頭秋到處片雲溪上雨來時
公方紫綬金章貴可愛山公白接離

城上

孤城縱目盡南東山轉溪回翠且重雲際靜浮濱漢水
林端清送上方鐘今時漢北無雛鳳當日襄南有卧龍
萬事廢興無足問登臨吾樂正從容

和念一弟

岡陵盤曲土湖深蛟蜃伏藏山鳥吟大雪埋雲冬寂寞
喬松挾竹晝陰森百年身逐無涯智萬斛愁填方寸心
昨日汝詩催淚落暴添溪水兩三尋

戲招史秘校

畫橈隱隱水中閒紅粉相瞻幾淚潛行客自言歸意樂
故人終惜別情難羞慚俗吏浮生拙歎息神仙一夢閑
慢拾酒杯留客住春風底死笑人慳

雜咏

小林幽徑自春華不似城頭望處佳山色倚雲千萬里
蓬門穿水兩三家聲聞翠篠紛紛葉香落寒梅細細花
更上山亭望南北欲隨幽鳥到天涯

和濟叔兄書齋言志

未得臨流一醉觀江山應是怨無端苦吟夜月橫詩筆
爛醉秋風把釣竿溪瀨最宜霜後聽峯巒曾向雨中看
輸君瞬息窮千里冉冉羈懷幾萬般

子直見和前韻因復之

平時祇畏才無敵今日方知器有餘一第已多新宦況
潛思猶入舊田廬鳳皇固合棲阿閣騏驎誰令駕鼓車
千里青雲今至矣願傾深畫盡傳予

元夕與莘老俱宿齋因寄莘老

零雨其濛春始和明星有爛夜如何笙簧故與風聲遠
燈火疑添月色多漸老自能忘世味欲明更起看天河
定留太一青藜照願寄荆人白雪歌

賀兄長有子

鵲曾將喜信來奇祥昨夜出珠胎一枝始得龍孫貴
萬里看成驥子材道路笑臨詩首首庭闈歡上酒杯杯
風吹消息歸江國老稚應須眼為開

過紫金山

薄晚遲留問舊山塵埃敢意紫金丹雲生石眼千年潤
風出雲梢五月寒下蔡塗泥黏馬足長淮風浪觸魚竿
八公更有威靈在簿領應須笑賤官

擬賞花釣魚詩

琉璃宮殿雲深處錦繡池塘雨過時魚躍定名千歲鯉
花開多是萬年枝恩流河漢波瀾闊春在蓬瀛日月遲
三十餘年無此會今朝會見柏梁詩

孔雀橫斜寶扇回雕龍浮動翠輿來魚知迎日爭先躍

花會留春獨後開
法部方張九成樂侍臣
迭送萬年杯
太平恰似唐虞際
臣主從容賦起哉

和文淵遊餘干山寺

愛山終日在山巔
山徑遲留幾屐穿
澗水曲流隨步履
爐香深聚作雲烟
峩峩健馬橫富石

邑有白馬石

漠漠蒼龍

宿舊淵

寺有龍井

為語琵琶洲上路
幾時容我繫歸船

途中寄君時弟

郵亭車馬日紛紛
可遂塵埃老此身
燕子恰如曾宿客

鴈奴猶是未歸人
晚雲明滅初收雨
朝日陰晴擬放春
花未一時渾自好
寄聲華髮莫爭新

老兒挈幼小將及鄧因寄君時弟

長年騎馬走風塵
擾擾猶如夢幻身
野柳最憐青綬客
山桃莫笑白髭人
照溪七里亭邊晚
近郭百花洲上春
捉塵即從君道舊
浮蛆更許我嘗新

送徐望之郎中提舉舒州靈仙觀

江瀕遠別幾秋螢
汴曲相逢眼更青
予志自能同豹變

弋人安得望鴻冥風流綠蟻千鍾酒香火黃庭一卷經
祇恐諸公還薦鶚未容輕去老巖扃

呈運判學士

邂逅江濱宿使航五更窗外月猶黃因陪譚麈殊優遠
自反羈心愈渺茫老馬但羞千岳阻病翰孰與九皋翔
明時賴有吾宗在敢學西鄰便涕傷

次韻晦之浴牒楚泗二州

鷁首爭先鳥翼飛宦遊容易即天涯漸生世事無由盡

已去年華不易追
芍藥遂輸淮上樂
櫻桃終念水邊期
雨餘亭外山爭出
幾日相看一酒卮

四方

四方難綴遊人足
萬里無嗟客子蓬
紅滿桃花生細浪
白翻蘋葉起清風
路當吳楚塵相接
源出淮夷勢未窮
聞說夜吟清不盡
月明如近水晶宮

送濟叔兄

風起青蘋去鷁催
江山無路笑言陪
淚生滿眼朝千里

愁入枯腸夜九回秋水忍看鴻獨宿春風好與燕俱來
別期重有文章約老稚應須眼為開

治平諒闇元夕

上元無樂送長宵淚灑城陽泣帝堯雲障月華寒澹薄
風吹雨點細飄飄物隨世事生悽愴天與人心長寂寥
不用燈花鬪光景火爐詩筆慰無聊

合肥府學中賡詩公韻和寺正翔甫總翠

危亭縹緲壓城端總拾澄虛入畫欄地勢西連金斗峻

山容東際湫湖寒行瞻日月光華近坐覺乾坤器度寬
聞說南州畫工在可能收作畫屏看

和應詔吟

又得華牋是浣溪短窗翰墨自光輝寒梅不動情相照
幽鳥無聲意欲飛數四思嘉成海濱百千文字粲珠璣
風花未稱相望意特為君王述萬幾

秋風

風戰江湖飛斷梗露零霄漢聽征鴻身雖流俗志萬里

昔是少年今老翁雙眼久因塵事黑病顏今為酒尊紅
夜深蝴蝶歸魂夢飛盡蓬瀛島嶼中

讀書

讀書雖苦亦何知仕宦紛紛彊此時舊學望君真短短
新詩愛我已枝枝清生野檻晨風遠暖度山窗晝日遲
出處從今能自卜不庸著蔡已無疑

汴水呈祖道

萬事無庸輕是非扁舟吾語子同歸不知心逐征雲遠

安得身先去鳥飛月入江湖生夜色風吹花木長春暉
鬢毛每笑多新雪衣帶頻驚緩舊圍

江口道中

道路春晴柳葉長川原水涸草蒼黃陰晴天氣猶寒食
邨邨人家似故鄉地曠馬牛羣放牧時平兒女自耕桑
馬蹄即踏江南路邨店相看酒一觴

寄子文友

古人湮沒不能見交道陵夷真可哀與子碧江相別後

到今青眼未曾開幾傷尺素無人寄猶喜新鴻昨夜來
懷抱相思長抑鬱燕居還念此心哉

和千乘先生詩

蓬華猶淹濟世圖獨持經術振羣愚困窮自古饒賢者
功業於今屬丈夫天下久思安石起時人爭笑孟軻迂
何時幣聘來莘畝佇聽嘉言上禁途

風便示君時叔宜二弟

挂帆瞬息絕遠水行李逡巡臨故鄉雨潤棣棠千葉葉

雲深鴻鴈一行行
清吟未愜溪山勝
熟睡不知岐路長
邂逅此時同此樂
護堂卮酒意難忘

簡振道判官

涉汴浮淮即渡江
一春飽滿看滄浪
臨溪高柳為誰綠
隔浦幽花還自香
暖日魚兒浮密藻
輕風燕子語危檣
遙知物景煩酬唱
到日詩成幾百章

江流

江流繚繞轉天涯
萬幅風帆去若馳
紅日遠山開殿閣

青天高木出旌旗蛟龍迴泊鱗鱗動燕雀飛翻羽翮遲
身世百年長擾擾扁舟多謝捕魚兒

君時與董君佐以鄉薦相次登甲科有詩送之

邀予同賦

青衫慰子久蹉跎各喜流年壯未過金玉曹劉初並價
淵源游夏復同科紅塵去馬侵新月綠水歸舡觸芰荷
邂逅故鄉秋正好相看憶聽鹿鳴歌

東湖

草色蒹葭蘆葦中蓮花一片萬枝紅斜陽色妬波心日
細雨香吹水面風澤國地開金色界桃花人在水晶宮
扁舟便好如張翰好在溪邊舊釣筒

楊浩狀見寄因次其韻

百年流轉笑浮生憂思隨時苦未寧心膽愛君長似水
鬢毛如我欲垂星春風半夜燒燈院臘雪窮年祭酒廳
夢寐舊遊如昔日可憐庭柏自青青

和萃老城東齋祠

天上春來今幾時
園林已自足光輝
桃心欲放輕紅出
柳眼初分嫩綠歸
解凍暖風吹浩蕩
養花新雨落霏微
知君準以多行樂
佳句何妨及繡衣

急雨

遠岫低連野水蒼
溪田急似雨淋浪
靈壇冉冉雲烟淨
小徑深深花草香
落日客帆千點細
秋風漁笛一聲長
詩成未解酬真賞
追逐須將夙願償

送正夫之鄆

清河如練月如霜六月舟行亦自涼
驄馬何為輕去國錦衣不害數還鄉
高材落落邦之傑令問洋洋民所望
城上望公公更遠人閒今日日何長

以去年詩再答正夫

不願與公終食違別離草草不勝思
老便靜處溪山好嬾見閒中日月遲
論易朱雲折其角說詩匡鼎解人頤
歲云暮矣來何晚倚杖相望一水涯

飲君宜弟所寄緇衣酒繼得書因成小詩奉寄

少時離別似尋常老大別離多感傷飲酒看雲心散漫
開書對雨淚淋浪棗棠密織花成錦鴻鴈斜書字作行
未到與人貪富貴會須同汝老耕桑

答毛提舉惠新酒雞頭依韻奉寄

齊鵲順風飛上天空籠遠至扣猶全

正仲寄酒雞頭至
南陽某既歸襄陽

但有書滑思琥珀千鍾滿軟憶珠璣一樣圓舉白醉攻

愁自破硫黃煖與病相便

南人謂雞頭
為水硫黃

南歸幾夢涼堂

會咫尺書來更愴然

寄周朝議立樂堂

世味中人醉不醒公歸正似解人醒歸雲意思閑方見
瘳鵲精神老更清但與堯民時擊壤何須秦女會吹笙
淵明已有歸來賦桀溺應容作耦耕

山遊

試拂塵衣訪遠蹤詩魂獨與賞心同低低弱柳啼秋雨
細細寒蛩嘯晚風崑石溪流相照綠草花楓葉一般紅
玉琴寫盡逍遙意疑到蓬瀛島嶼中

過嶺上

山幽漸失塵埃路勢險方知造物功
崑溜飛光動天上樵斤遺響落雲中
煙迷曲島千峯細日轉環區萬里空
安得謫仙來並此醉浮風馭過蟾宮

將寄豫章以詩先寄文淵祕校

已傳靈耗煩晨鵲更作新詩寄塞鴻
千里薄寒霑暮雨百壺清笑望秋風
仙人樓閣重湖外帝子亭臺翠靄中
謝石未忘丘壑意待攜歌妓醉山東

新建宰徐仲文尉甯文淵出城見錢

詩句飛華照采牋
酒花浮綠動金船
眼看世態嗟無益
心到天真喜自然
盛德優容聞召父
清才脫灑愛梅仙
卻嗟風雨催行色
不得相從醉洞天

得趙吏部所附第二書

日月不停如轉車
怱怱還見歲其除
已行沙漠數千里
纔得京華第二書
一讀令人喜不寐
萬金於我實何如
遙知日月從三友
弟勸兄酬樂只且

望雲嶺飲酒

班荆解馬面遙岑北勸南酬喜倍尋天色與人相似好
人情似酒一般深

接伴待制舉酒云人情似酒一般深

豚魚尚可及人信

吳越何難推以心立望堯雲搔短髮不堪霜雪苦相侵

諸君約歸日

黃金束帶錦貂裘白髮追隨每自羞已見冰漸流碧水
遙知春色滿皇州紅開金谷樓前面綠暗玉津池上頭
衰病到家應稍健為公須醉百金甌

歸期

歸期元約是花時
曲指花時定可歸
日暖擁雲迎馬首
天寒飄雪點人衣
老狐淚落不忍別
野鵲性靈相近飛
到得歸時春更晚
故園桃李正芳菲

同遊獨山

獨山亭子山之心
萬竹相圍盡翠陰
古剎地幽紅日永
懸崖人靜碧雲深
輕風細細無朝夕
勁節依依自古今
吏役幾嗟詩筆廢
興來不惜為君吟

和蔣孝廉江行

江為雨頻增浩蕩物因霜重益淒涼
千年老木戰風色萬里澄波浮日光
梅萼半紅渾臘意麥田微綠已春陽
欲留佳賞無尊酒空引詩魂萬尺長

送臧夢符秀才歸

匹馬駢駢冒曉征故人惜別涕雙零
青雲器業方千里窮巷生涯獨一經
節目已疎非杞棘源流不竭即滄溟
餘閑且盡詩書學莫遣塵埃悞性靈

重至

亭臺池沼皆依舊惟愛清風日日新
念遠恨無雙羽翼
臨流安得一絲綸
好花有意重留客
幽鳥無情亂苦人
滿眼澄光清可賦
與君無厭往還頻

平居多憂閒從詩酒自樂即席為詩呈諸友且
寓一時之懷也

不惜千金換濁醪為君窮力賦
離騷乾坤盡入雙吟眼
日月都歸一醉毫

此壬寅歲夢中所得之句

平昔至誠傾益契
昨宵

遊夢得夔皋窮途知負經綸器爛醉西風首重搔

和君時十二弟

漂泊東南天地閒分明身世似乘船此生去住總未定
所值險夷皆偶然載酒縱隨紅芰飲移牀深近白雲眠
知君獨處多幽趣詩軸今成第幾篇

春雨

三月江淮物正新等閒風雨挫芳春狂飄柳色低垂地
暗損花枝自惱人壟畝千家知有望江湖萬里喜通津

鵲原莫放韶華去共約新晴醉綠茵

將歸寄潤之弟

紛紛窮緒不能禁一縷俄驚百萬尋風月正牽相望眼
山川難繫欲歸心蕭條又作新秋意牢落誰同永夜吟
車馬鼎來吾即起夢魂先傍竹亭陰

牢落

牢落歸來水一隅卧思天闕自煩紆祇知今夕又明日
不覺少年成壯夫禍去不虞堪太息勢臨無備獨長吁

憂時未有如君老願聽丹囊上禁塗

東流道遇伯兄西歸

君棲京國我天涯病眼相望淚滿衣邂逅得為千里會
倉惶不及一言歸窮通固屬時之遇取舍猶慚議者非
未得寵光榮里落久行猶足慰庭闈

東流道中作

輕快飛輿出古城蟠迂行徑轉沙汀鷗鷺映日開鱗翅
鴻鵠鬪風翻雪翎水瘳不藏寒石綠雲歸纔見遠峯青

苦憐野色溪光好倍覺詩魂酒魄醒

寄伯兄兼問子文二首

富貴浪圖雖汨汨詩書餘力尚桓桓聖門一室相從易
世路多歧欲合難儀鳳穩依深閣宿老蛟寒即碧溪蟠
青雲有侶歌魚藻空谷無朋唱考槃緣木退藏腫漢翼
扁舟歸整釣鼇竿臨風願聽王陽仕洗手思彈貢禹冠

又

壯志當年欲請纓孤蹤今日尚飄萍塵埃易染羈容黑

義氣難邀俗眼青
馮客劍寒長自擊
伯牙琴古欲誰聽
風雲勇膽馳燕塞
社稷丹心望漢庭
思入鵲原愁四散
夢馳鶯谷涕雙零
客棕願託詩情見
吟盡清宵卒未醒

十四弟得書承已次東流赴省試因寄小詩呈

推官承務弟

恰見蜘蛛喜便知
鴻鴈來大波窺
洶湧遙岫見崔嵬
懷王欲心折折書
先眼開繫舟龍化
處亭子舊名雷

雲居相送至下杉莊

金剛經
卷七
暮宿昏初黑晨裝曉已分雞啼江上月夫呿嶺邊雲好
去龐居士善來洪上人臨行須一勸臘後幾時春

惠州

霧暗山千疊冰寒水一涯風高天作雪日晚露迷沙居
士身如夢行人驛是家青燈無意緒點點自成花
絕域冬猶暖孤邨日易斜浮雲點晴漢幽鳥篆平沙白
草單于壘青燈渤海家夜蟾無定處流轉共天涯

和通判承議

水邊人不到吾與子同行始見游魚樂時聞幽鳥聲山
如仁者靜風是聖之清擬買扁舟去江湖老此生

有感

往復何為者功名安在哉茅心迷簿領蓬鬢老塵埃魚
蠹生書帙蛛絲在酒杯淵明緣底事苦死賦歸來

醉極有感

飲極人之樂余心反自傷氣因人憤激情與酒飛颺淚
落侵雙鬢愁多鬱寸腸空羸山簡醉不似與天狂

日暮

人去紅塵息幽林晚意清
秋陽紅旆亂夕靄翠紳橫
新月澹無色微風寒有聲
此吟猶未竟城吏已嚴更

題揚州因大師小池

閑寂黃金宇清泠碧玉池
軒楹收泠澹松竹讓幽奇
岸蹙源流淺山陰月到遲
未能活魚鼈安可卧蛟螭

江上

柳翠蘆花碧楓殷蓼更紅
金波連夕照玉浪起秋風
霄

漢雙飛鳥波瀾一釣蓬江湖如許景總合付詩翁

伏承寵示滕王閣佳句因用元韻

滕王帝子閣徐孺聘君亭南浦水秋漲東湖雲晝冥江
山晴更碧松檜雪逾青安得泛舟去與公同醉醒

示庭佐弟

世味祇如此銷憂奚所娛心煩多惡酒眼病頻捐書倦
倚筇枝竹寒圍木火爐公寧機械廢我拙笑公愚

和題真相院

山色隨行止溪聲滿見聞燈花秋寂澹香火夜氛氲野
色迷修竹廚煙長白雲大夫材力健故寵寺僧懃

和題淨慈寺

已失禪關治空嚴古殿尊佛香塵草莽僧飯飽魚豚萬
竹藏秋色豐碑落燒痕癡興俱物鑑誰似語公孫

寄公權

靈源起幽谷蕭灑與秋宜世事有窮處泉聲無盡時流
雷一山足澤入萬田滋祇恐明朝別清風到夢思

薄荷

神農取辛苦病客愛清新
寂澹花無色虛涼藥有神
煩心浸冰雪眩目失埃塵
自是芝蘭臭非同草木春

寄鄒祕丞同赴京師

馬上梅曾賦林邊酒記賒
乾坤新帝業山野舊人家
自昔餘篇翰經年五歲華
詩成無鴈寄一夢入天涯

道中

湖天冬不雪山地晚多風
岸草猶全綠邛花或自紅
差

池歲聿莫寂寞雨其濛南北隨蓬轉浮生旅寓中

內鄉招提寺

淫雨宿蕭寺白雲思楚山病摧顏色老淚裊鬢毛斑流
水終何事飛禽倦未還夢歸無別處驚嶺鳳林闕

途中蚤起寄兄弟

為惜庭闈別方驚道路難醉憐山月古病怯野風寒駐
馬詢農耜臨溪問釣竿新詩如有得寫染寄歸翰

武岡驛

破屋山閒驛窮閭溪上邨雲山能近郭池水故當門氣
象生詩筆波瀾動酒尊夜長歸夢遠憑爾與招魂

催君時歸并寄居宜弟

命彼僕夫駕雞晨初一聲朔風不可渡南徑卻堪行貧
莫甚今日瘞無如爾兄故慚魚得計最愛鴈能鳴

答君時弟

夢覺山頭月歸乘湖面風遠林寒寂寂幽徑曉蒙蒙反
哺鳥鳴屋成行鴈貼空物情緣底事祇欲攪予中

承和途中四韻

此身俱是客何處合為鄉
雨後春山好天晴晝日長
三年穰下郡一信赭陂陽
鴻鴈非中澤鴈鳩祇在桑

小飲幕長晦之并簡王路分

小飲支風色清言慰客襟
阜鵬寒獨出雲影澹無心
短日催冬至長更報夜深
幾時辱車轍重約盍朋簪

次德甫韻

露染黃柑熟霜添紫蟹肥
天真俱自得世路偶相依
飲

數初憂病歡成復忘歸醉吟侵夜色星月淨輝輝

和富夫花字韻

幽亭隔世路高閣見天涯綠散林邊葉紅生水上花人
歸越溪藕僧進壑源茶可念詩翁物都歸野叟家

試諸葛生筆因書所懷寄諸弟

臘雪催寒盡春風送暖微浪為青綬繫愁望白雲飛塵
事朝朝在鄉心夜夜歸歲時如故國憶戲老萊衣

自別番江夜還移楚水春寄聲何草草流誨已諄諄世

路文章貴人生手足親杜詩賈馬賦數數寄魚鱗

最憶東林竹蕭疎入夢魂秋枝餘鳳實春逕長龍孫聲
轉晨風細陰生夜月繁幾時歸袂接爛熟醉芳尊

鴨腳東林畔慈親手自栽取心俱有實視表獨非材白
玉成千粒紅紗寄百枚江南春去蚤花復幾時開

見說東林地盆池近種蓮清風生綠水酷暑日冒炎天物
外無雙格花中第一仙即今春已到應復葉田田

吾憶東林北庭前巧作山乍晴風苒苒久雨蘚斑斑漁

釣滄浪靜樵歌白日閑蓬瀛仙世界容易落人間

初夏

薄領紛相壓塵埃懶不堪輕陰人割麥微雨客憂蠶照
水荷衣薄迎風柳鬢鬢微吟聊自釋一夢滿江南

端午

日上天心直風生水面寒羈窮念時節草次具盤餐買
藥知衰病開尊得小歡醉懷江國味撥櫂倚江干

次芸叟韻

雪霜歸漢塞星露近蘇天金錯千兵甲花團五馬韉春
從今夜好月勝別時圓頗笑荆溪老猶譚般若禪

接伴太傅離新館其兄迂於途

使者乘輅至將軍走馬迎侏離何所語踴躍不勝情寓
目鴻鴈澤傷心秋杜行天乎非有聞我老獨無兄

與蔣十二

子立羈窮際相逢邂逅間交遊新氣槩塵土舊容顏共
指青雲遠同分白日閑區區交友志松柏滿南山

同許屯田子仁宿圓通寺

遠水猿谿古孤峯石耳懸慈悲開一徑智慧出雙泉大
士車乘鹿幽人社結蓮欲知今邂逅猶是昔因緣

自臨川泛舟還歸因假前韻寄粹老提舉朝議

兼簡知府龍圖丈

舟行朝市隔恣意看溪山天地青春遠江湖白日閑偶
隨鷗獨往卻與燕俱還時節清明近應須屢破顏

匹馬千山遠扁舟宇宙寬歲華春已仲時節食初寒稍

憶恭爭勝還須飲盡歡使君如見問行李已河干

將行李自鄱陽來

伯也別何遽叔兮來未央水流心去遠月靜夢歸長
細雨溼護草高風吹鴈行幾時生事足相著老耕桑

得書并簡仔仲二姪

遠宦非予欲浮生如此何幾時俱省定終日念漸磨
流水嗟蓬轉青雲喜鴈過寄書盈萬字不似淚痕多

正月初三日送叔宜弟初離襄陽

月魄纔生夜春風恰到時
異鄉愁對酒深院靜論詩
道路嗟吾老雲霄恨汝遲
莫言明日別徒益鬢邊絲

冬寒圍爐

道路冬無雪山原臘始寒
平林風力疾落葉雨聲乾
冰玉詩腸瘳江湖酒量寬
庭闈即予樂不必事杯盤

和濟叔冬字

雨聲傳半夜雪意盡窮冬
氣味閑相愜形骸病見攻
冷呵詩筆凍寒啜酒醅醲
且劇紅爐飲行聞古寺鐘

分題得思字韻寄甯文淵

風雪今之夕湖山百爾思
欲歌鶯谷意不忘春原詩
臘意生梅萼春容動柳枝
塵埃一千里歸夢自遲遲

和濟叔小飲韻

島嶼風回北滄溟月上東
苦吟詩眼碧小酌病顏紅
城近更籌數天寒斗柄中
且安顏巷陋無泣阮途窮

吏部閣子前有千葉菊因酌同僚口占一首

一花幾千葉千葉一時開
曉露紅雲拂春風舞雪回
薄

言酌吾酒亦道賞花來自是蘭臺勝桃源安在哉

欲雨

雨勢將滂沛風聲自嘯號柳眉含碧淚花臉膩香膏厚
澤宜蘇物微寒怯減袍詩成歡不足終擬醉春醪

新晴

一雨淒涼夜羣陽發育春風雷驚舊蟄泥滓倦行人花
秀千家圓波添數尺津新晴何處好郊外草如茵

過揚瀾

路入揚瀾險心魂獨惘然秋風浪飛屋春雨彌天一
葉漁翁艇千鈞客子船相爭蝸角利平地看深淵

春風

三春含造化一雨灑空虛寒色宵無定輕陰晝未舒
臺花色重道路馬蹄疎燕雀乘風便應言莫我如

先赴東流因寄虞蔣諸君

相愛不能去欲行還復留山川蕩行色風雨結離愁
紅日千山曉清霜萬木秋回頭望車馬目斷白蘋洲

途中作

窮冬尚羈旅行色太淒涼白雪園林好紅塵道路長暮
雲寒不散斜日澹無光夜宿溪山靜清風滿肺腸

次張瑞甫貧飲韻

霜濃溪水縮雨多竹風多久病予無賴微吟子為歌遠
心傾塞鴈窮緒委江波貧飲祇如此世人誰復過

寄庭佐弟與閨之同作

狂風朝不定急雨暮相連麗澤已春意濃寒猶臘天紅

爐雙酒艇清夜一詩篇不見東江客臨風意惘然

江上晚起

水昏如欲雨霧落復非雲浩蕩重波影微茫小岸分大
明瞻日曉微暖報風薰隱約廬山寺孤鐘續續聞

和春城北

何曾看好春已復見春深水漲千溪綠松低一路陰薄
書淹世態難忝亂鄉心莫廢清和飲枝頭李可沈

和祖道國門外文淵子至東父餞席上贈別

行李隨長道飄蓬笑賤官望雲瞻白日臨水看驚瀾鳥
語如知節花開尚怯寒莫嫌春色淺留到後園看

夜泊睦州桐江

一水連銀漢千山擁古城客乘清夜息舟倚碧溪橫皓
月危峯影清風細浪聲嘔啞殊俗語慘澹異鄉情途旅
淹時月羈窮獨弟兄剛腸雙古劍蕩跡一流萍道路人
皆厭風波我亦驚胡為甘險阻所得喜豪英俗眼無相
笑吾非逐利名

秋日吟呈諸友時在合肥作

綠髮猶年少衰顏苦病多陰寒傷物色渴雨蠹天和杯
酒開寥落靈著問輶軻凋疎頭鬢亂敲側齒音謠苒苒
時難得紛紛日易蹉荆蒿太狼藉圭角未消磨廢棄今
如此云為竟若何嗟傷仁者遠幸望故人過臘意生幽
徑春心獨綠波幾時樽俎共爛醉聽清歌

和國信子育元韻

傍火時尋柏子燒青燈笑語夜寥寥殊方更喜人情好

長日不知山路遙

過右北平

太平天子不言兵
擁節來經右北平
論將無人思李廣
笑譚樽俎倚儒生

真州江亭

潮落淮風怒不收
昇州一日到真州
多情楊柳能青眼
底事波瀾亦白頭

和履中學士上元有作

樓頭星斗爛文章錦綉中焚百合香月似中秋燈似畫
總將明德奉吾皇

市廛商塵野廢耕通宵笑傲樂昇平樓前樂奏九成曲
樓下人呼萬歲聲

二月己亥曉出城祀高禩

嫋嫋溪邊楊柳絲紛紛牆外小桃枝流鶯恰似無機械
春滿人間亦未知

塵沙騎馬聽溪流澹薄春風卻似秋坐憶洞庭波萬頃

灘聲長在釣魚舟

塵土冥冥二月風寥寥天外有歸鴻
松陰想見芝山路
隔浦溪花岸岸紅

奉使湖南遇雨寄叔宜

暮雲不冑破重陰祇繫護堂夜夜心
馬上北風吹淚落
細隨疎雨溼衣襟

寄廣漢

今年萬載驛逢冬恰似淮南風雪中

赴詔時冬夜與廣漢宿舒城道中時

雪天草草杯盤渾自足笑譚只欠布袍翁

君宜弟還鄱陽風雨未行馳寄此詩

鴻鴈行行如弟兄天寒故故作秋聲江湖寂寞風雨急
今夜扁舟行未行

泛豐陵溪

溪邊置酒稍徘徊坐看溪聲滾滾來傳語鸕鷀與鷓鴣
暫時相見莫相猜

天寒欲雪不可出門君時在城中促庭佐來君

時東云庭佐掉頭云未來因馳寄

伯兮引領望不斷叔也掉頭云未來事事傷心無說處
終朝眼合不能開

和君時弟芝山避暑

避熱猶如避火攻盡將身世隱壺中微雲急送鹿頭雨
遠水故吹牛首風

次雲居老詩韻

荆山有玉比山丘愛玩還將木李投掣電一機吾會得

天邊月在水中流

和提舉送淮長老住延壽寺

天地悠悠共故鄉
眼前差別亦多方
欲知道濟庵前路
俱是將軍舊戰場

江上

波瀾浮動月翻翻
細雨吹風忽在門
溪上酒家何處所
青燈明滅見漁邨

都官以詩求菊栽次韻謝之

新詩來乞菊花秧種植還須近宋牆
待得來年花爛漫約君顛倒醉秋香

草

草色初成城上春春風步履觀浮雲
踏青未得遊人見煙日遮藏待使君

柏

落盡桃花梅子英一枝霜雪自光榮
猛憐夜月紛紛影頻聽秋風細細聲

碧蘆

碧蘆滿眼送清秋
瀟灑憐君似退休
一夜高風搖翠玉
五湖歸夢落漁舟

答雲居佛印禪師

江湖萬里扁舟上
巾履維摩丈室中
每愛師如蓮出水
卻嗟予作鳥窺籠

和都官看雪

孤成帶雪望天涯
瀟灑風清自一家
景物尚嗟春意滿

雨枝零落不成花

梅子

道上人家梅子枝
背春還復葉離離
詩翁觸物俱歸思
不用風前叫子規

記京中伶人口號

伶人作語近初筵
南北生靈共一天
祝願官家千萬歲
年年歡好似今年

雨霽

荷花十丈出塵埃
鷗鳥雙飛近酒杯
雨霽黃雲收拾盡
青山還會逐人來

泊真州新河亭

鬢毛垂雪欲移移
道路風波老不堪
繫纜短亭聊自慰
青山數點見江南

走筆和蕭推官迎提舉承議

青山遠遠水回回
初見鍾陵城上臺
將迎不獨兒童喜
楊柳看人亦眼開

船中見廬山

翠色蒼茫杳靄間
船人指點是廬山
浮雲作意深藏護
未許行人取次看



宋百家詩存卷七